

江灣里志卷九

警務志 警察 消防  
衛生

警察

本區警察屬於商埠範圍向不歸縣轄當清宣統二年夏即由上海巡警總局派警開區駐鎮中武帝廟內初稱上海北段警察第七區設區員一人巡官一人長警六十人民國二年淞滬警察廳成立乃改爲淞滬第六區警察第一分署四年二月復改爲淞滬警察第六區第一分駐所駐警四排設署員一人巡官一人每排巡長一名巡警十名其在江灣南境者如結一圖橫浜橋之淞滬第五區警察署設署長一人巡官三人長警一百二十人於光緒三十一年三月創辦初爲上海北段巡警第三區迄民國三年而

江灣里志

卷九

警察

一

改組爲警察署結一圖虬江橋之第五區第一分駐所虬江路之第五區第二分駐所各設署員一人巡官一人長警在六十人以上均於光緒三十三年六月創辦初亦列入北段警區迄民國三年而改組爲分駐所又如第五區第三分駐所則創辦於光緒三十一年半屬上海半屬邑境亦於民國三年改組者綜本鄉各警察之主管言之其初皆隸上海巡警總局民國而後總局名稱屢改元年春則爲閘北民政局秋又改爲閘北警務公所二年一月又改爲閘北巡警局二年四月淞滬警察廳始成立三年一月又改爲閘北警察分廳七月仍改爲淞滬警察廳蓋商埠警察機關之權限名稱雖屢有變革而本鄉警察之隸屬商埠則固始終隨之轉移也

## 消防

舊有水龍四架民國元年里人蔡章王兆濟黃文瑜等發起組織救火會整頓消防購置新式洋龍二架一係黃文瑜捐資獨辦一係蔡章蔡敬忠沈寶賢王兆濟倪承桂等倡捐合辦旋復添購小洋龍一架設事務所於留嬰堂訂定章程推舉蔡章爲會長王兆濟沈寶賢副之呈縣立案並請頒發圖記會中辦事則由會長督率職員分部掌理當由蔡會長擬具計畫六條其中最要者爲放寬街道多開公井改良操法正在協議進行常年經費約五百元由縣就本鄉總甲保證金項下指撥一百八十元不足之數由各界分認特捐自民國元年以迄八年已刊有報告顛末具詳規模蓋稱完備矣

## 江灣里志

### 卷九

消防 衛生

二

## 衛生

禁煙附

清潔道路爲衛生警察最重要之事本鄉清道向歸警察辦理經費則以房捐充之其在南境者亦歸警察辦理經費由工巡捐局提撥民國初元曾有衛生公局之提議以限於經費迄未實行惟防疫之法以偏近租界關係深爲注意專款籌辦就寶山路寶興里北首設立闌北防疫所受轄於淞滬警察廳所長一員由廳委任醫生並無駐所之規定每年自春季至秋間遣派警役消毒捕鼠並委員隨時檢查界內有無疫症報告廳部如有鼠疫等發見廳部衛生科派警會同處理染疫者送附近中國公立醫院療治每月經費四百元以省欸撥用

## 禁煙

清光緒三十三年全縣設戒煙總會本鄉則設戒煙分會經費卽酌提膏捐充之宣統二年全縣改設禁烟分公所本區則舉陸顯周嚴恩棫二人爲協贊員

民國元年益厲行禁煙之政乃由縣委任嚴恩棻王兆濟爲禁煙專員對於吸戶販戶照章取締從嚴全鎮膏店遂一律於年內閉歇其在南境各圖經上寶兩縣知事會議辦法四條別設閘北禁煙調查處以錢松麟爲禁烟專員就事實上之便利歸上海禁煙局主辦查獲違禁事件亦由該處轉送上海檢察廳處分三年以後煙禁漸弛本鄉以偏近滬埠私販私吸者窩藏較便益視禁令若弁髦矣